



Aningaasanut Nunanullu Allanut Naalakkersuisoq

Aningaasaqarnermut Ataatsimiititaliap suliaq nr. 01.31.06/06-00190 pillugu pingasunngornermi ulloq 6. december 2006-imi aalajangiinera pillugu Naalakkersuisunut ilisimatitsineq.

(Naalakkersuisut ulloq 7. september 2006-imi aalajangiinerat)

Alluitsumi (Lichtenau) tulattarfiliassaq nutaaq

Naalakkersuisut **inassutigaaat**,

- kontomi pingaarnermi 87.43.10-mi, Umiarsualivinnut tunngasumi, suliassamut nr. 017.24.109-mut, Alluitsumi tulattarfimmut nutaamut tunngasumut, aningaasaliissutit 2.800.000 kr.-inik amerlineqassasut.
- Kontomi pingaarnermi 80.00.01-imi, Nuussinissanut sillimmatinut tunngasumi, ani-ngaasaliissutit 2.300.000 kr.-inik ikilineqassasut.
- Kontomi pingaarnermi 80.00.80-mi, Aningaasanut suliniutinik aallartitsinissamut sillimmatinut tunngasumi, aningaasaliissutit 500.000 kr.-inik ikilineqassasut.

Aningaasaqarnermut Ataatsimiititaliap oqaaseqaatai

Suliaq matumani pineqartoq nukinginnartut suliarineqarnissaa qinnutigalugu Naalakkersuisunit ulloq 11. september 2006-imi nassiunneqaqqaarpoq. *Aningaasaateqarfiup RealDaniam* Alluitsumi takornarianut atortulersuinissaq siunertaralugu illutoqqat eriagisat iluarsanneqarnissaannut 12,7 mio. kr.-inik atugassiinissamik neqerooruteqarnera nukinginnartumik suliarinninnissamik kissaateqarnermut tunngaviuvoq. Tamatumani piumasqaataalluni attaveqaatinik pisariaqartinneqartunik, tassungalu ilanngullugu tulattarfimmik Namminersornerullutik Oqartussat pilersitsinissaat. 2006-imi septembarip qaammataata naanginnerani neriorsuffigineqarnissaa RealDaniamit qinnutigineqarsimasoq paasissutissiissutigineqarpoq.

Apeqqutit arlallit akissuteqarfigineqarnissaat ataatsimiititaliamit kissaatigineqarmat suliame Aningaasaqarnermut Ataatsimiititaliap isummernissaa ataatsimiititaliap ulloq 14. september 2006-imi aalajangiinerani kinguartinneqarpoq. Septemberip naanerani akissuteqarnissamut killissarititaasup eqquutsinneqarnissaa siunertaralugu akissutit taakku piaartumik tiguneqarnissaat ataatsimiititaliap qinnutigaa. Ataatsimiititaliilli apeqqutai Naalakkersuisunit aatsaat ulloq 28. november 2006-imi akineqarput. Naalakkersuisut akissuteqaataat Alluitsoq pillugu ilassutitut qinnuteqaammik ilaqartillugu nassiunneqarpoq, tak. Aningaasaqarnermut Ataatsimiititaliap suliama 01.31.06/06-00217. RealDaniamut tunngatillugu 2006-imi novemberip naaneranut nutaamik piffissaliussap eqquutsinneqarnissaa siunertaralugu ilassutitut suliap taassuma nukinginnartut suliarineqarnissaa Naalakkersuisut aamma qinnutigaaat. Aningaasaqarnermut Ataatsimiititaliap apeqqutaasa pisariunngitsut akinissaannut Naalakkersuisut qaammatit pingasut sinnerlugit atuisimanerat eqqarsaatigalugu Aningaasaqarnermut Ataatsimiititaliap sulineranik ataqqinninnginnermik naammagineqarsinnaangilluinnartumik Naalakkersuisut ersersitsisut Aningaasaqarnermut Ataatsimiititaliaq isumaqarpoq!

Tulattarfissatut pilersaarutigineqartooq Davis-strædimut sammisumiissasoq ataatsimiititaliamit paasineqarpoq, tassanilu sikorsuarnik sunnerneqartassasoq, tamatumalu ilaatigut kingunerisaanik piffissaq atorneqarfigisinnaasaa killeqassasoq ilaatigullu tulattarfik sukkasuumik aseroriartussalluni. Tamatuma saniatigut najukkani innuttaasut eqqarsaatigalugit aammalu takornariaqarnermut atatillugu atortulersuutit pioreersut eqqarsaatigalugit nunatsinni piffinni allani umiarsualiveqarfiit pitsanngorsaavigineqartariaqartut ataatsimiititaliaq isumaqarpoq, taakkulu assersuutigalugu ilagaat Qassiarsuk.

Alluitsumi illutat (aammalu tulattarfik qinnuteqaatigineqarpoq) Namminersornerullutik Oqartussanit pigineqartut aammalu piginnittussaanerup Sulisartut Højskoliannut, naluneqanngitsutut imminnut pigisuusumut tunniunneqarnissaat piareersarneqarsimasooq Naalakkersuisut Aningaasaqarnermut Ataatsimiititaliamut akissutaanni takuneqarsinnaavoq. Pilersaarut taanna naapertuuttuunngitsutut Aningaasaqarnermut Ataatsimiititaliamit isigineqarpoq. Pisortat illuutaannik imminut pigisumut tunniussineq missingersuusiornermut malittarisassami 2002-meersumi immikkoortoq 12.5.2-imut naapertuutinngitsutut ataatsimiititaliaq isumaqarpoq, taannami malillugu pisortat pigisaannik akeqanngitsumik tunniussineq aatsaat pisinnaavoq kommunimut, Naalagaaffimmut ingerlatsivimmulluunniit tamanit atorneqartartumut tunniussineq pippat. Tunniussineq akeqanngitsumik pissanngippat Namminersornerullutik Oqartussat sapinngisamik annertunerpaamik iluanaaruteqarnissaat aallaavittut qularnaarneqartussaavoq, tamannalu tamanut neqerooruteqartitsinikkut nalinginnaasumik pisarpoq. Aaqqiissutissarli taama ittoq Naalakkersuisut qinnuteqaataanni ilaangilaq.

Suliniutip Sulisartut Højskoliannit aqunneqassasoq qinnuteqaammik aamma takuneqarsinnaavoq. Pisortat sanaartugassanut iluarsagassanullu aningaasaliussaannik aqutsinermit akisussaanerup imminut pigisumut taamaattumut tunniussineq naapertuuttuunngitsooq Aningaasaqarnermut Ataatsimiititaliaq isumaqarpoq.

Tamanna tunngavigalugu Naalakkersuisut inassuteqaataat Aningaasaqarnermut Ataatsimiititaliamit akuerineqarsinnaanngillat. Alluitsumili illutat iluarsaannissaannik pilersaarut taperserini ataatsimiititaliap oqaatigissavaa, tassungalu atatillugu kujataani kommunit suleqatigiilernerannut atatillugu suliniummut tassunga kujataani kommunit suleqataalernissaa kaammattuutigissallugu.

Suliani 06-204-mi aamma 06-217-imi aalajangiinini ataatsimiititaliap innersuussutigai.

Aningaasaqarnermut Ataatsimiititaliap aalajangiinera

Siuliani oqaaseqaatit innersuussutigalugit Naalakkersuisut inassuteqaataat Aningaasaqarnermut Ataatsimiititaliamit **akuerineqarsinnaanngillat.**

Inussiarnersumik inuulluaqqusillunga

Jens Lars Fleischer
Siulittaasup tullia